

# Voces de Queempostela

Folleto Mensual  
de Información

Nº7, Novembro-1996

Editado polo  
Colectivo Gai de  
Compostela

## Xa está pronto o informe sobre agresións

Déspois de ser revisado polo colectivo gai coruñés Mil-homes, o informe sobre a violencia homófoba na Galiza está pronto para a sua difusión. A Comisión Anti-Agresións está xa a confeccionar a lista de meios de comunicación aos que lles será enviado o informe. Este tamén se ha mandar, como quedara xa acordado, aos grupos parlamentares galegos. Lembra que podes pedir a tua cópia: escrebe á comisión ou pasa polo local.

## A piques de sair un novo número do S'homos

Tras receber a subvención da Dirección xeral de Política Lingüística e seren entregadas as colaboracións que faltaban, o texto a as imaxes do novo S'homos están en proceso de maquetación. Neste próximo número haberá dous artigos sobre a familia, ademais das habituais seccións de novas rosas, cine, literatura e música. Volve-se contar coa colaboración do debuxante de cómic Suso Pedreira e coa maquetación de Dani Rodríguez. Desta vez, a impresión fará-se nunha empresa diferente, xa que oferta uns prezos notablemente máis acesíbeis. Así, por primeira vez, o S'homos poderá autofinanciar-se en máis dun 80%!

## O CGC na celebración do Dia Mundial da Sida

Como xa se acordara, o CGC vai participar na celebración e organización dos actos conmemorativos do Dia Mundial da Sida (1 de Decembro), propostos polo Comité Cidadán Anti-Sida de Compostela. En concreto, o colectivo encargará-se de decorar o local (o Tarasca) onde se ha ce-

lebrar a festa do 1 de Decembro. Ademais, o CGC vai instalar unha mesa informativa na Praza do Toural na maña do próprio dia 1. Ofereceranse á cidadanía folletos, voceiros, autocolantes e cartaces.

## Folleto sobre a sida

Co gallo do Dia Mundial da Sida, o CGC decidiu sacar á rua un novo folleto informativo sobre a sida especialmente dirixido á población gai. Baixo o anagrama SSS (sexo, sida e solidariedade), ofrece-se unha serie de información sobre o sexo seguro. Neste folleto tamén se incide na loita contra a discriminación das persoas seropositivas e contra a hipocrisia social xerada a partir da aparición da sida. O texto do folleto basea-se en campañas doutros colectivos gais e está supervisado polo Comité Cidadán Anti-Sida de Compostela.

## O CGC no 22-F

A asemblea do CGC decidiu sumar-se á convocatoria da manifestación que se prepara en Madrid para o vindeiro 22 de Febreiro co fin de pedir a aprobación duha lei de parellas de feito. Tentará-se buscar meios de transporte para achegar os voluntarios e sócios do CGC a Madrid. Canto meirande sexa o número de manifestantes do CGC, máis barato ha ser a viaxe até Madrid. Apunta-te! Escrebe ao apartado ou pasa polo local para pedir información ou dar ideas.

## Abandona-se a COFLHEE

A asemblea do CGC acordou abandonar a Coordinadora de Frentes de Libertación Homosexual do Estado Español. O non apoio dos representantes desta coordinadora á manifestación de Madrid e a sua atitude na última reunión preparatoria de Bilbao iniciou o debate no seo da asemblea do CGC.

Chagou-se á conclusión de que a COFLHEE non consulta as suas decisións cos colectivos que a integran ou, alomenos, co CGC. Por outra banda, viu-se que non todos os colectivos seguen os consensos da coordinadora. Ademais, o CGC recibe máis información e mantén un contacto máis fluido con colectivos gais alleos á COFLHEE (GTH, ILGA-Portugal, COGAM, Casal Lambda, etc...). A decisión de abandonar esta coordinadora non implica unha ruptura das relacións cos distintos colectivos que a integran, nem tampouco coas ideas que a fundamentan. A partir de agora, o CGC manterá-se independente procurando potenciar ao máximo a relación con todos os colectivos gais e lésbicos do noso contorno.

### **Éxito da festa na Conga**

O CGC cualificou de exitosa a festa celebrada no pub Conga 8 o pasado 20 de Novembro. A asisténcia superou a expectativas e a participación do público nas actividades programadas foi do más positivo. Conseguíu-se unha moi boa recadación e, ademais, os responsábeis do local desexan que o CGC o volva escoller para a celebración de próximas festas. Ante o éxito acadado nas últimas citas, xa son vários os locais da zona vella que manifestaron estar dispostos a acoller actos lúdicos organizados polo CGC.

### **Carta-protesta para o parlamento da Roménia**

Xa empezou a se distribuir a carta-protesta dirixida o presidente da cámara parlamentar romena para pedir a despenalización da homosexualidade e o cesamento das disposicións lexisativas homófobas neste país balcánico. As posibles respostas que se podan receber só poderán dirixir-se ao apartado do CGC, xa que este é o único enderezo indicado na carta-modelo difundida. Xa sabes, non deixes de mandá-la.

### **Protesta á equipa de goberno municipal de Sitges**

Atendendo á chamada feita en diversos foros de debate homosexual e polos colectivos gais e lésbicos cataláns, o

CGC está a preparar unha nova campaña de protesta por correo ante os feitos acontecidos nos últimos meses na vila de Sitges. O seu goberno municipal, unha coalición de partidos conservadores, está a levar unha política de acosamento á nutrida poboación homosexual da vila. Se tes novas ideas para acción ao respecto non deixes de escreber ao apartado ou de pasares polo local do colectivo.

### **A Comisión de Publicidade comeza a traballar**

Unha nova comisión de traballo creada no seo do CGC comezou xa a traballar: é a de Publicidade. O seu obxectivo é o de difundir entre a cidadanía, especialmente entre @s homosexuais, o labor que desenvolve o CGC. A comisión comezou a facer un repaso ao que leva feito o CGC nesta liña coa intención de mellorá-lo aportando ideas novas para conseguir que a cidadanía se achegue de vez ao local do colectivo. Ainda son pouc@s @s que están a traballar na comisión, así que anima-te: escribe para aportar ideas ou lemas, ou pasa polo local para colaborares de xeito más directo.

### **Eleccións'96**

A asemblea do CGC acordou convocar unha reunión extraordinaria dos sócios numerarios do CGC para efectuar unha renovación consensuada nos cargos de responsabilidade do CGC: presidencia, secretaría e tesouraría. A asemblea extraordinaria convocou-se para o dia 10 de Decembro no local do CGC a partir das 20:30 h.. Nesta reunión, ademais, pretende-se marcar os obxectivos de traballo do colectivo e das suas comisións ao longo do ano. Non deixes de asistir, decide e participa !!!

Xa sabes....  
escrebe-nos ao Apdo. 191  
15780 Compostela  
ou...  
visita-nos na Rua Entremuros,  
nº16, Baixo, de luns a venres a  
partir das 20:30